

寧河縣志卷之十二

撰述

敕封儒林郎吏科都給事中致中杜公墓誌銘

大學士 金之俊 吳江人

杜公 諱 守禮 字 致中世居寶坻之梁城所其先為金

陵世族始祖 諱 敬以昭信校尉扈從明成祖文皇帝

封燕邸有功遂以世爵居梁城所 即今寧河縣 敬生寬寬

生奈奈生銘銘生仁世有令德為燕望族仁生朝先

是為公考厥時袁公了凡為寶坻令政事之暇擁臯

寧河縣志

卷之十二 撰述

一

比講學公執策從之深究性命之旨且於天下形勢  
要害及兵農禮樂之事無不晰其原委如列眉如指  
掌然性恬靜不樂仕進以布衣行善鄉黨間生子二  
長守約蚤卒次則公也公甫齠髻穎異過人受小學  
口誦心維毅然謂聖賢可學而至補博士弟子員不  
屑章句日取歷代史漢晉魏註疏昌黎廬陵諸集潛  
心披誦炳蘭燃膏寤言一室雖寒暑弗間也立身飭  
行以古自期邑大夫重其品未嘗一至公庭而干謁  
焉學日富試輒蹶笑曰吾安能與少年輩爭一日之

勝負也遂棄鉛槧怡情詩酒每良辰勝日招親故陳  
壺觴留連竟日性不好謔宴集雖數而襟帶整飭未  
嘗有媠容人益敬公生平不譚人過常言天以不言  
自高地以不言自厚人亦何必過於分明也里中有  
小事相爭者每以片言而解後復有然者悔曰當無  
令杜公知之故梁城稱仁里焉又嘗言人之在世當  
無一事不可與天知人皆傳誦其言謂公得於學問  
者深也及少宰兄弟輩成立延名師督課每月試二  
次試必以七義公以身先之搦管爲文七義立就曰

寧河縣志

卷之十二

撰述

二

吾老且益壯况方富春秋者於是諸子咸以文學著  
譽一時崇禎己卯少宰舉於鄉公猶踴勉弗替如諸  
生時癸未少宰成進士公弗色懌曰文章事終行業  
事始矣諄諄誠諭又不啻如孝廉時及少宰官給諫  
典試浙闈公與之書曰願子之慎君事也卽子之盡  
親志也每迎養入都少宰進綺縠陳旨腆輒却而弗  
顧曰吾家累世儒素布帛菽粟有餘適也癸巳三輔  
游饑

上特命重臣分賑少宰時爲少司馬乘傳以往全活甚衆

公諭以事竣卽趨

闕勿枉道以老父爲念少宰兢兢奉諭不遑寧處甫竣事而公遽以訃聞遠近無不痛悼之公生平勤苦好學雖未登仕籍以殫厥施然立身飭行以古自命鄉里化之澹泊寧靜絕無世俗之好每入都輒於市肆搜古今逸書手自校閱老而不輟敦尚故舊與人交始終弗渝周人之急拯人之難有古指困風嗟乎如公者寧可多得於今之世哉公始以

覃恩封儒林郎吏科都給事中加一級公積德累仁食報

寧河縣志

卷之十二

撰述

三

方始知此後膺

綸綍而光泉壤者未艾也公生於萬歷辛巳年十二月二十八日卒於順治甲午年四月二十七日享年七十有四公年踰七旬古昔稱難且少宰公

簡用方隆豐功偉績蒸蒸未艾行將上弼訏謨下被寰宇余且拭目俟之是公未得之於躬者大得之於後也余敬爲之銘銘曰

書香三世其遇何艱克生哲嗣闕閱以光繕脩蘄完訓迪蘄嚴操茲左券厚德彌昌煌煌

帝詞賁爾幽泉左林右阜大海洋洋宜爾子孫鴻瑞蟬聯

杜公文端墓誌銘

大學士王熙宛平人

康熙三十年夏六月八日光祿大夫保和殿大學士  
杜公卒於家遺表聞

天子震悼賜祭二壇飭所司治葬事諡曰文端蓋異數也  
公之子員外郎恭俊將以十二月初四日葬公於寶  
坻梁城所之東原而屬余銘諸墓余公之年家子也  
少時數奉公詞色於長安邸中嶷然先進典型迨後  
侍公同朝又習見公誠心質行發皇功烈有古大臣

寧河縣志

卷之十二 撰述

四

風心竊慕效而不能及也文雖不斐其何敢辭公姓  
杜氏世居鎮江府之金壇縣明初有諱敬者以昭信  
校尉從永樂中靖難有功授梁城所千戶世襲遂爲  
寶坻人公生有異兆長而攻苦積學舉明崇禎癸未  
進士恭遇我

朝龍興以薦授中書舍人尋考選兵科給事中累轉吏  
科都給時天下初定

世祖軫念生民甫脫湯火思欲減租賦興文學以俾兆民阜  
成臻於至治而法制未立四方尚未罷兵繇役數起

吏或因緣爲奸公次第條舉其事疏言自古帝王致治必由經術宜及時舉行經筵日講擇廷臣經明行修者爲講官裨益聖治又言荒地以闢勘爲憑亡丁以審編爲據請自今蠲荒之數分疏欵項預行頒示使小民咸喻上指則胥役不能爲奸又言條編之法簡易便民近因軍興旁午草豆未有定額往往取辦臨時愚民無知賣妻鬻子徒飽奸吏之囊橐誠可憐憫請勅該部酌定價值使民先事爲備又言禮部示諭朝期每月不過三次請於朔望行大朝禮使羣臣得以陛見陳所欲言若進見稀濶則上下之情不通且非臣子尊王之義其言愷切深中時事

寧河縣志

卷之十二

撰述

五

世祖由是器公擢公太常寺少卿尋晉工部右侍郎轉兵部左侍郎賑濟大名全活甚衆還報遷吏部會丁父憂以前任兵部時舊案鐫一級服闋補太僕寺卿轉大理寺卿刑部侍郎尋加太子少保陞刑部尚書公任刑部號稱寬平吏讞獄或不當輒却其獄卽當而著讞必求其可生分別奏之

世祖章皇帝喜公用法平恕卽皆從輕比如公奏於是益知

公可大任矣辛丑正月

今天子御極以公舊臣歷有聲績七月調戶部尚書初公爲給事中稔知錢穀出入盈縮及吏所以侵牟狀於是奏請各部寺錢糧皆歸戶部考成一切皆自省吏但坐曹治文書不得爲奸謀以最報五月加太子太保尋轉吏部尚書澄敘官方銓政以肅丁未六月京察自陳請罷溫旨慰留八年特拜公內國史院大學士是時

朝廷清平百度修舉

寧河縣志

卷之十二

撰述

六

天子以寬仁慈恕休養天下天下稱治安者久矣

上知公忠謹持重有大體加委任焉是年

乾清宮告成擇日臨御欽天監奏言吉神在某方不宜從中門入公當次對面陳遷正新宮自宜從中門入且

帝星所在卽爲吉神欽天監妄奏非是

上以爲然明年十月改內三院復爲內閣授公保和殿大

學士兼禮部尚書辛亥纂修

玉牒告成充修

太祖

太宗聖訓總裁官壬子七月

世祖章皇帝實錄成

賜鞍馬金幣加太子太傅癸丑京察再自陳求罷不許

八月充纂修

太宗實錄總裁甲寅十一月

命公相眎

山陵於懷柔縣乙卯恭題

仁孝皇后神主丁巳七月公引年陳請益力不報尋遣充

寧河縣志

卷之十二

撰述

七

冊立

中宮副使持節行禮己未恭題

孝昭皇后神主庚申

詔赴瀛臺

賜御書一軸行書唐詩一卷公以求去未得反獲榮寵

益甚悚懼尋遇病不視事時值滇逆蕩平與天下更

始議頒恩赦詔書以公卧病未與議

命近臣持詔款問所增益公以

皇上天地父母之心纖悉俱備臣愚更何所臆議爲對壬

戊正月

賜羣臣昇平宴念公在告特徹御宴上尊就第

賜公手詔慰問尤爲特恩殊數云久之公病不愈復上

疏乞休詞甚哀懇

上不得已許公致仕

賜公

御製送行詩一章

御書勒石心經一卷怡情洛社圖章一方栢梁體詩一冊

遣行人護送許所過地方馳驛人以爲榮公旣致仕

寧河縣志

卷之十二

課述

八

家居又以

太宗實錄告成

賜公銀幣鞍馬加太子太師二十六年冬十二月

太皇太后崩明年正月公入哭臨

上以公老且病不任拜起命學士張公英掖公而行

天語慰勞徹賜御茗文綺以示寵眷公在內閣十四年以

彝鼎重望爲海內儀表功業施被於人而不謂已出

嘉謨日聞於

上而不使人知遭遇



聖時百官遵職海內又安雖以三逆之梗草薶禽獮曾不旋踵用能以忠謹受知爲鼎臣緝緯太平之業聲施無窮歷事

兩朝寵遇優渥亦未有如公之盛者古稱君明臣良千載一時厥語真不虛哉公爲人慈和謙慎恂恂寡言及當大事決大疑則持正毅然不可奪居諫垣因事陳奏不見於封事者裨益尤多歷掌三部練習朝章遇事有措置援據掌故參酌時宜兼集衆長期於允當其任司寇最久於亭平庶獄尤極敬慎常曰我待罪都

寧河縣志

卷之十二

撰述

九

官數年不能自必無過但見得一分盡我一分職分以仰答

聖恩於萬一耳蓋能真實力行不愧其所言者及在政地奉公思職誠懇出於自然一意佐

聖主施恩布澤以嘉惠海內遇物坦平不存畛域雖布衣下位無生平之雅者果有一長必爲稱引嘗主浙江鄉試再主禮部會試皆稱得人遇昆弟尤相友善田宅錄蔭皆不吝推與今歷任至廬州太守君名立本者公之異母弟也家居惟課子弟讀書然不爲科名

計與寒素爭進取皆人情所難者公諱立德字純一號敬修享年八十有一銘曰

顯允文端令儀維則淳篤忠誠百僚是式在昔起家經術文章彩筆五色雲錦七襄景運肇開聖作物覩公以才徵雲龍風虎特達之知三錫九遷畫省夕拜卿月清懸秋官祥刑度支判賦晉陟統均延登揆路公忠奉職翼翼小心順承天施以沛商霖在野在朝推公長者勳茂彌謙位高善下溫然冬曦藹若春陽光大含宏行以直方功成釋位

寧河縣志

卷之十二

撰述

十

帝優耆老寵以天章煌煌睿藻

勅下所司給傳護行都人聚觀歆美其榮曰

聖天子特頒殊數優獎耆俊匪私公故完福令名惟公則有駿望鴻猷其傳不朽天不憖遺

皇心愍惻載錫嘉名爲營兆域梁城之原穹窿其邱公魄妥安神從天游赫奕聲光流慶孫子我爲銘詩昭示無止

廬州守華升杜公墓誌銘

侍郎王之樞

杜公諱立本字華升先世爲金壇人始祖以軍功世

襲梁城所千戶遂爲寶坻人高曾而下悉以文端公  
貴贈如其官行事俱載文端公墓誌中公行五母爲  
劉太恭人公少受天穎讀書日進年十七補博士弟  
子旋丁贈公憂時染疾卧床匝月矣聞變披跣哀號  
伏苫次勺水粒米杖而能起如是者疾返愈人咸驚  
爲孝感也文端公回翔臺閣受

兩朝聖主之知自大冢宰洵登政府公雖不廢佔嗶然往來  
京邑於京則任贊佐於家則任督理訓誡宗人無有  
招搖耀冶竿牘於縣吏者約束僮僕無有鮮衣怒馬

寧河縣志

卷之十二

誤述

十一

呼飲於酒家者至今稱家法之善推杜氏焉遇

今上卽位覃恩文端公篤念同氣八人惟公在遂以公名  
、上胄監己未授刑部陝西司員外郎奏讞無所阿徇  
一軌於正辛酉恭送

仁孝皇后梓宮事畢

賜宴及幣四月轉戶部山西司郎中奉職愈謹癸亥以  
積次出爲江南廬州府知府文端公方致政里居劉  
太恭人亦春秋高公戀戀不欲行曰吾不欲以叱馭  
易南陔擁麾違雁序也太恭人及文端公皆責以大

義始勉強就道廬州雖江南大郡然瀕江帶山地瘠民悍徵求科派率官一而吏十故刁民藉爲口實訟訐無虛日公下車卽革牙帖之陋規凡千餘金詳慎刑獄無枉濫者推求民隱無陳滯者興學校嚴僚屬絕苞苴尤急於荒政遇歲歉煮賑請蠲緩徵寬役一以古循吏之道治之悃悃無華不爲矯異廬之人勒碑頌之後以微累罷人咸欲公往白當事可寬其咎公曰吾不奉菽水十一年矣鬱鬱居此望雲興歎縱官三公曷若歸侍高堂之爲樂耶圖書數卷蕭然抵家入覲太恭人則色喜出對姻友則神暢課田園督種植洽賓友睦宗族澹泊自甘樂天知命杖藜布褐往來田坂間遇之者不知爲五馬貴人也上事太恭人孝養愈誠衣膳必視先意承志庚辰伺

駕縣郊

天語褒詢往返迎送日事鞍馬不以爲勞癸未劉太恭人告變公年已六十七矣哀毀悲號盡禮有加蓋天性篤孝老而彌摯如此公性好施與歸里後益甚邑常遭水歉公捐家粟數百石以贖親友隣里之貧乏者

或曰是宜留爲來歲之備公曰邑之人非吾子侄卽  
姻婭人饑吾能獨飽乎一無所惜丙戌歲里之人方  
將爲公舉七表之觴乃於三月十三日得寒疾至二  
十三日遂卒元配郁恭人婉淑而恭勤事上逮下克  
盡婦道先公二十年以丁卯八月十三日卒公念之  
甚遂虛正室不復設公生華胄而澹以居心敬以涖  
事敦篤孝弟而嫺睦親族是皆可誌也公生於崇禎  
丁丑年十一月二十七日亥時卒於康熙丙戌年三  
月二十三日巳時子四人恭宗恭揆恭睿恭偉女三

寧河縣志

卷之十二

撰述

三

人孫銓銘曰

五陵舊族惟杜與韋奕世滋大實繁東畿煒煌文端  
補

帝袞衣公實繼之雙鳳齊飛五馬出守一琴來歸上壽全

福似公者稀風濼水聚神其式依

廣信守承三杜公墓誌銘

通政司

勞之辦

杜公諱恭俊字承三別號拙庵畿東之寶坻縣人太

子太師保和殿大學士兼禮部尚書諡文端杜公之

第三子也世籍江南之金壇始祖以軍功襲梁城所

千戶遂家焉高祖仁曾祖朝先祖守禮皆以文端公  
貴贈如其官文端公元配爲王夫人卒繼配王夫人  
生二子均早世公之生母則李恭人也文端公得公  
也晚最愛憐之而公亦岐穎凝重開敏儼如成人親  
友咸以克家目之壬寅授一品廕生仍事佔嗶志圖  
大就至甲子奉新例不得入試始以家督代文端公  
應門戶事凡敦宗族睦親友訓僮隸課租佃皆承文  
端之志而善將之及文端公引年

子告所以娛暮景者幾視無形而聽無聲問安視膳一遵

寧河縣志

卷之十二

撰述

十四

古則未嘗不雍怡而樂也辛未文端公薨於家  
賜隧

賜諡諸恤典雖

皇上優念老臣褒寵有加而公之周旋詳盡者可爲孝子  
不匱矣丙子授工部都水司員外郎丁丑轉刑部河  
南司郎中於漕事洞悉如老吏且奉身清謹人不敢  
干以私事到卽辦才大而心細人不知其爲少年貴  
介也旋丁繼嫡母王夫人憂回籍守制文端公昆季  
八人惟五弟廬州公存子四人亦惟公存公事廬州

公如父凡事請命無間邑中舊令欠帑數百金公蠲租給之人有鬻女償官者代其償而嫁其女事之涉于義者無不爲心之期於厚者無不盡文端公雖貴顯然參贊密勿不遑謀家宗祠猶未建公於庚辰之春伺駕於縣郊

上詢知爲文端公子問及遺藁墳墓深所嘉獎御書永言惟舊匾額製自

內府馳頒公家遂經營宗祠於梁城所堂序厨庫秩然具

寧河縣志

卷之十二

撰述

五

備中懸

御書春秋二祭觀者歎美且以叔子繼伯兄後季子繼六弟後嗚呼公於文端公可謂肖子矣服闋補督捕司郎中陞江西廣信府知府束裝赴任便道歸家疾作八日而卒蓋患暑也且有異徵語云山致其高則雲雨興焉水致其深則蛟龍起焉君子致其道則福祿歸焉公在親爲孝子在弟爲友兄在鄉爲長者在國爲名臣乃年不酬學才未盡展何歎若其生平大節則可縷述已今以丁亥年四月初三日卜地於祖塋

之東南而葬且以李恭人祔焉李恭人婉孌賢淑事  
上逮下罔不合節且治家能勤馭身以儉先公七年  
卒公生於辛丑年十一月二十六日酉時卒於甲申  
年五月二十二日亥時得年四十四歲任督捕司郎  
中加二級時遇

聖恩授中憲大夫元配李氏吏部左侍郎兼翰林院學士  
李公錄子女

誥封恭人子二長端怡王孺人出聘劉氏巡撫湖北都御  
史劉公殿衡女次廣怡穆孺人出聘王氏少傅大學

寧河縣志

卷之十二 撰述

六

士諡文靖王公熙女女一未字穆孺人出銘曰嗚呼  
是爲文端公之肖子生於是葬於是旣利旣固以安  
其嗣

若洲杜君墓誌銘

大學士 張廷玉 桐城人

乾隆三年歲在戊午河南直隸陝州知州杜君終於  
家越三年壬戌君葬有日其孤奉狀來請銘曰仰藉  
奕世之舊敢乞一言以光泉壤且以垂不朽也余念  
君祖文端公與先文端公同官於

朝先後贊密勿爰篤世好君胚胎先業出仕親民爲循



良吏而未竟設施以歿北平三世昌黎所悲余雖綜理乏暇隧道之銘其奚忍辭按狀君諱適文姓杜氏字紹衣號若洲先世居江南金壇明昭信校尉敬從成祖封燕世襲千戶遂爲順天寶坻人五世祖仁高祖朝先曾祖守禮俱隱德弗耀祖立德由進士歷官太子太傅加太子太師保和殿大學士兼禮部尚書諡文端

誥贈三世皆如其官考恭俊以廕補刑部郎中遷江西廣信太守妣李恭人君爲廣信公仲子生妣穆太宜人

寧河縣志

卷之十二

撰述

七

出也少稟穎姿器局不凡十歲喪父偕昆季居喪讀禮盡哀旣長博觀羣書慷慨有經世之畧事母孝雞鳴盥漱鞞紳維謹尤善制舉藝每得佳句雖老師宿儒弗如也然而五困棘闈益厲志不輟方思博一第以繼前人光而雍正七年歲己酉

世宗憲皇帝稽閱太常篤念舊勞加恩世裔

特命引

見圓明園時余在班列望其趨入拜墀下旣風儀都雅及奏對又條達甚蒙

上旨嘉獎欲畀以民社以未卒業辭

天子曰欽往哉未有學養子而後嫁者竟發河南以知縣試用歷署內鄉鄆城西平臨潁縣篆所在有惠政時田公爲制府政尚嚴明君隱濟之以寬讞決平允不以苛法繩民尤留心地方利病築隄捍水親行督率捐養廉以給值霖雨水發因隄守護歲不爲災其實心任事多類此十二年 題擢鄧州牧引

見溫旨訓諭君勉勵有加鄧民五方雜處尚氣輕生君示條教俾知自盡無抵償律民始悔前之爲訟牒清簡

寧河縣志

卷之十二

撰述

六

制府行開墾令君察果欺隱者上報未嘗抑民以爲已功他若捐俸以修 文廟重建春風閣百花洲以存范文正公之遺蹟創造養濟院活民之無告者一時士庶稱爲召杜復出君顧自謙謝謂我何能惟不負此心庶報

國家延賞之恩守前人清白之風而已乾隆元年今天子嗣位制府富公以勤敏果毅

題授直隸陝州知州入見稱

旨其治大畧如鄧州時陝州城中乏水源引渠以濟飲汲

歲久淺涸君捐貲率民疏消自分水嶺注城三十餘里水常無竭至今爲利州儲穀萬餘石發民碾米賑陝省出入吏易爲奸君較量畫一不累民而弊絕此皆其治行之可法者穆太宜人春秋旣高迎養於郾城後三遷秩皆奉板輿以從太宜人寢疾侍湯藥煮粥糜必手親之晝夜未嘗脫冠帶至是疾旣篤乃卜於神請以其身代不吉遂歿於州署君扶櫬北歸哀毀骨立服未闋而病遂不起矣嗚呼君自爲縣令遷州牧歷任九載廉潔自持苞苴無所入養廉之外時

寧河縣志

卷之十二

撰述

九

鬻產以濟乏愷悌之德及於閭閻古循吏何以加設天假之年其所建樹當更有可觀者惜乎其遽止此也君友於兄弟厚於族屬不妄交遊於所友勸善箴過一切能瀝肺腑車馬衣服與共不少有德色更樂成人之美下逮臧獲佃農咸有恩意居官侍母少暇恒手一編間吟咏以自適素嫻步騎射發必中的君之行誼類有過人者君生於康熙乙亥十一月初十日歿於乾隆戊午七月三十日年四十有四乾隆七年四月十二日卜葬於寧邑孟家莊之原廼系以銘

曰京兆之族宰輔發祥世祿由禮貽謀孔臧

帝念展勳用光

恩命墨綬花封式敷惠政繼遷州牧榮蒞專城蔭棠留愛  
酌水明清讀禮而歸居廬致毀年胡不延強仕而止  
隙駒滋感宿草增哀聲猷足述流澤方來鬱鬱佳阡  
吉卜食焉銘刊幽室昭信千年

永春刺史劉公行狀

左副都御史

羅源漢

長沙人

乾隆己丑六月福建永春州直隸州知州劉公卒於  
家是歲秋將卜葬於蘆家霧之新阡其孤奉狀來請

寧河縣志

卷之十二

撰述

三

綴詞余於牧伯爲同年友知公素稔繙狀蹟胥可信  
今傳後爰不敢辭按公諱毓珍字儒懷號雨村順天  
寧河縣人祖諱從新植基忠厚父諱廷弼殖業遺謀  
克承克啓公其長子也幼凝重奮志自立執經請業  
矯異羣從塾師山左李來祥先生愛而重之數爲其  
父兄稱賞曰振劉氏家聲者必此人也嗣是力學益  
堅稍長入京師尋知名士相與切劘涉獵經史尤貫  
徹左氏傳其爲文清真雅正立言皆有根柢及小試  
輒冠軍蜚聲 畿輔歲壬子薦於鄉癸丑成進士觀

政刑曹期滿授福建建寧縣知縣建邑素稱刁悍前任多罹於辜公至其地廉潔自持爲之逐訟師禁溺女勸義倉以裕民食立義學以振文教興剔孽畫恩威並行遇饑歲平糶穀米全活甚衆其辦理有方深爲上憲嘉獎兩攝邵武篆及會勘汀漳大案俱著能聲所至多歌咏功德有古循吏風焉乾隆九年題陞永春州知州去之日建邑之民攀轅祖道依依如赤子之脫慈母額前小序一篇令人不忍卒讀入京時舟行過天妃閘中流騰湧桅纜斷絕合家愴惶舟人撒手以爲必無生理公仰天祝曰吾在閩七年未嘗受民一錢今憑天所與已而風恬浪息穩載而渡舟中人盡驚以爲神到京仰荷

綸音之官永春繞道歸省見堂上雙親垂白音容非昔遂

有歸養之心勉強束裝南行到任值歲荒卽日詳請開倉平糶民賴以安永人頌德不已諸政如建寧歲週赴省陳情乞養上憲允其請未抵家而父母已相繼俱逝矣比至門雙柩在堂公大哭慟倒在地絕而復甦者再數日不食家人咸至勸曰君不爲營葬計

乎公乃少啖此後葬祭盡禮服闋閉門不出日課諸子孫輩讀書有相契親朋至則談論今古杯酒相懽歷晝夜不倦居常手不釋卷至忘寢食乾隆辛巳予任京兆時嘗因公抵寧館於公家之東軒以爲奇逢作長夜之談至今猶想見其風度公伯仲三人次諱毓玠太學生善理家務三諱毓珣幼喜讀書乙卯舉於鄉中年善病因廢學日習草書筆法遒勁識者多藏之公生於康熙丁丑七月十四日卒於乾隆己丑六月二十七日享年七十有三遇

寧河縣志

卷之十二

撰述

三

覃恩誥授奉政大夫夫人廉氏

誥封宜人生子男一卽立誠附貢生女三孫男二長慶曾邑庠生次述曾太學生孫女二曾孫男三通建通源通熙其嫁娶世系詳家乘謹粗錄所記憶及公嗣君所奉狀以復於先生長者備採擇焉

論曰碑銘誌狀在文章爲史之流最宜尚實自官斯土者妄邀墮淚之思爲子孫者曲求諛墓之筆紛紛撰述甚無謂也昔蔡中郎爲曠代逸才以其爲時貴濫作碑銘貽譏大雅則辨其誣者不可不審矣寧邑

自分縣以來行政日淺布澤未深而此泐石所存題  
頌所及亦因時紀事殆無溢美以崇實也若杜文端  
公以宰輔發祥遞膺殊數璿琳古碣巋然獨存豈非  
不朽之盛事邪